

Ngwi Pyaw Simsai Ai Dingku

Tsawra ai shiga madat nu wa hpunau ya ndai lamang hta gaw asak aprat hta hkan nna kun dingku ni hta mu mada lu ai lam hpe garan kachyan ya mayu ai.

Anhte Myanmar Mungdan masa hku yu dat yang asak 35 – 45 ning lapran na kun dingku kanu kawa ni gaw dingku de ai ten 10 ning lapran re ai ni law ai hpe mu mada lu ai. Dai majaw dai asak aprat ten na kanu kawa ni law malawng gaw tinang a kun dingku rawt jat galu kaba lam hte kashu kasha ni a galu kaba lam,hpaji hparat lam ni hpe madung dat galaw shakut ai ten rai nga ai.

Dai hte maren tinang a kun dingku ngwi pyaw simsai lam lu na matu, mayu dama lahkawng maga na kanu kawa,makyin jingku ni hpe hkungga la ra ai,shada garum shingtau hkat nga ma ai.

Kun dingku de ai ngu ai gaw kade tsawra hkat nna mi rau nga ai raitim myit masa nbung,kyang lailen nbung ai chyasam masha lahkawng pawng da ai rai nga ai majaw madu wa,madu jan shada da myit tau ya hkat chye na gaw ahkyak la nga ai.

Ndai lam hte seng nna hpung magam gun Tarahkaw Sara hte asuya magam gun jawng sarama yan a kun dingku langai mi hta shan a lapran yak hkak ai lam ni nga ai raitim shada da mara shagun,mara tam ai,pawt sindawng ai lam ni n nga ai sha,langai mi a ra rawng gawng kya ai lam hpe langai mi chye na ya ai, shada hkam sharang chye ai myit bang tawn da rai nna yak hkak wa ai ten hta Karai Kasang kaw wenyi n gun la let nga sa ai majaw shan a kun dingku ngwi pyaw simsai lam lu ai hpe sakse hkam da nga ma ai.

Shan a shada chye na,myit tau ya hkat ai lam ni gaw kun dingku hta yak hkak ai lam chyawm gaw law law nga ga ai re. An lahkawng gaw hpung magam hte asuya magam gun yan re majaw chye ai hte maren asuya magam gun ni a shata shabrai mung a law ahtam nrai nga ai, dai hte maren sasana magam gun ni a kumhpa mung kade n law ai re.Raitim an lahkawng gaw mayak mahkak hkrum wa ai aten hta langai hte langai n gun jaw hkat ai,Karai Kasang kaw akyu hpyi ai hte n gun bai awai la ai rai nna mayak mahkak lam ni hpe tawt lai lu hkra shakut ai.

Ningrum ningtau jan hku nna rai yang shi a matu madu wa kaw na myit mada ai lam gaw shan a dingku hta kangka ai kawa tai na, ma ni hpe mung dingman ai lam sharin ya na,kun dingku masha ni hte nawku hpung masha ni yawng hpe mung Karai Kasang ra sharawng ai hku asak hkrung nga sa chye hkra kasi ningli kaja madun lu ai sagurem kaja majing byin tai wa lu na hpe sha myit mada ai

Ningrum ningtau wa sara mung ningrum ningtau jan hte dum nta masha ni hpe pawt sindawng galoi n galaw ai, ga ngwi ga pyaw hte sha tsun shaga ai. Ningrum ningtau jan hpe mung shanhte dum nta masha ni a matu kanu kaja langai re ai zawn sasana magam gun manang kaja langai mung re lam shakawn tsun da nga ai. Hpa majaw nga yang hpung magam gun ai gaw sara raitim shi a sasana magam lam hta ningrum ningtau jan gaw hpang kaw na ra nrawng hkra grai nan madi shadaw garum ya nga ai. Dai majaw ningrum ningtau jan rai nga ai Sarama gaw sasana magam hta mung, kun dinghku a magam hta e mung grai nan kangka ai hku nna woi nga ai dinghku kanu re lam mung tsun shakawn dan ai gaw yawng a matu kasi la hpa rai nga ai.

Tsawra ai shiga madat nu wa hpunau ni dinghku num ding la rai sai kaw nna gaw hpung magam gun mi rai rai, ja gumhpraw tam let hpaga ga ai mi rai rai, madu wa hte madu jan ngu nna kalang mi dinghku shang sai hpang e gaw langai hte langai madu wa mung madu jan a ntsa e, madu jan mung madu wa a ntsa e chye myit chye mang ya na, kaji kajaw re ai mara kaw na hkawt langai hte langai hkyamsa jaw nna chye na hkat yang gaw grai ngwi pyaw ai dinghku byin tai na re. Kaji kajaw re ai mang hkang hpe shada nchye na hkat ai majaw tinang a makau grupyin hta dinghku hka bra ai ni law law nga ai. Dinghku hka bra wa jang grau nna kashu kasha ni hpe matsan shayan rai, jam jau jam hkau jaw ai lam ni hpe mu mada ai, dai zawn nbyin na matu gaw dinghku kanu yan kawa shada chye na hkat na grai ahkyak ai ngu mu mada ai.

Bai nna ngwi pyaw ai hkristan dinghku byin tai lu na matu gaw langai hte langai tsawra myit hpe manu shadan nna kanawn mazum ra ai. Shada tsawra myit ngu ai n nga yang mara grai mu hkat chye nga ai. Langai a mara hpe langai mara dat ya chye ai myit nrawng ai rai yang dai dinghku gaw galoi mung ga li ga law nga nna sha dinghku ngwi pyaw na nrail nga ai.

Dinghku num hte dinghku la rai sai, kashu kasha ni hte rai nga ai ten hta langai hte langai akyu hpyi ya na, shaman ga tsun chye na mung grai ahkyak ai hpe mu mada ai. Karai Kasang hpe chye tsawra ai, Karai Kasang myit ra ai hku hkan let shi a shingnip npu hta sak hkrung hkawm sa ai kun dinghku gaw teng sha ngwi pyaw simsa ai dinghku byin tai lu na rai nga ai.